

**RESOLUSI
MUZAKARAH HAJI PERINGKAT KEBANGSAAN KE-38
MUSIM HAJI 1443H/2021M
6 - 8 DISEMBER 2021 / 1 – 3 JAMADIL AWAL 1443H**

"MENINGKATKAN KEFAHAMAN ILMU HAJI DALAM NORMA BAHRU"

Kertas Kerja 1

Tajuk : Niat di Miqat Bagi Jemaah Haji dan Umrah: Perincian Pandangan Fuqaha Mazhab Empat

1. Berniat di Miqat adalah salah satu wajib haji dan umrah. Jemaah yang menuju ke Makkah dan melepassi Miqat Makani tanpa niat ihram sedangkan dia ada kehendak untuk melakukan haji atau umrah, maka dia dikenakan Dam Tertib dan Taqdir.
2. Mereka yang tinggal di antara Makkah dan Miqat Makani yang lima seperti di Jeddah, Bahrah dan lain-lain, maka Miqat haji dan umrahnya adalah dari tempat tinggalnya.
3. Jemaah yang ke Makkah menggunakan visa selain visa umrah dan mempunyai kehendak untuk melakukan umrah, wajib berniat di miqat asal, sama ada niat secara biasa atau niat bersyarat. Bagi mereka yang melepassi miqat asal tetapi kemudiannya kembali ke miqat asal atau pergi ke mana-mana miqat yang jaraknya sama dengan miqat asal atau pergi ke mana-mana tempat yang jaraknya ke Makkah adalah sama atau lebih jauh dari jarak miqat asalnya ke Makkah boleh berniat di situ tanpa dikenakan dam. Sekiranya Jemaah tidak dapat kembali semula ke mana-mana tempat di atas, dia boleh berniat di tempat dia hendak memulakan perjalanan ke Makkah tetapi dia dikenakan dam.

Namun sekiranya Jemaah tidak ada kehendak untuk melakukan umrah semasa melepassi miqat asal, tetapi kemudiannya ada kehendak untuk melakukan umrah dan dia belum sampai ke Makkah, maka miqatnya adalah di tempat di mana dia ada kehendak tersebut.

Kertas Kerja 2

Tajuk : Isu-isu Berkaitan Daimul hadath Dalam Ibadat Haji

4. Daimul hadath ialah orang yang sentiasa berhadath sama ada berterusan atau terputus-putus dalam satu solat fardhu atau tujuh pusingan tawaf.
5. Jemaah daimul hadath yang darah terputus-putus boleh meneruskan solat atau tawaf tujuh pusingan tanpa perlu mengulangi wuduk.
6. Muwalat (berturut-turut) di antara wuduk dengan solat adalah salah satu syarat bagi daimul hadath. Walau bagaimanapun, dimaafkan jika diselangi antara wuduk dan solat dengan perbuatan yang berkaitan dengan solat seperti berjalan ke masjid, menunggu untuk solat berjemaah dan lain-lain. Oleh yang demikian, tiada uruf waktu dalam hal ini demi kepentingan jemaah haji.

Kertas Kerja 3

Tajuk: Syarat Mahram Bagi Jemaah Haji Wanita

7. Rombongan haji di bawah pengurusan **TH** yang disertai oleh sekumpulan wanita sama ada sebahagian mereka datang bersama mahram mereka atau tidak, boleh dikira sebagai niswah thiqat (wanita yang boleh dipercayai) dan rufqah ma'munah (teman yang boleh menjamin keselamatan). Oleh itu, wanita yang mendapat tawaran haji daripada **TH** maka telah wajiblah haji ke atasnya, jika semua syarat lain berkaitan kemampuan telah dipenuhi dan harus bagi seseorang wanita untuk menunaikan fadhu haji walaupun tiada mahram atau suami yang pergi bersama dengan syarat dia mendapat kebenaran suaminya. (tertakluk kepada terma dan syarat perolehan visa yang ditetapkan oleh pihak berkuasa Arab Saudi).

Kertas Kerja 4

Tajuk: Pemakaian Kelengkapan Pelindung Diri (PPE) Semasa Ihram Haji Ketika Berlakunya Pandemik Covid 19 (Ketika Musim Wabak)

8. Pemakaian Kelengkapan Pelindung Diri (PPE) yang menutup anggota badan yang dilarang semasa ihram bagi petugas dalam merawat pesakit wabak berjangkit, tidak berdosa tetapi dikenakan Dam Takhyir dan Taqdir, satu kali dalam masa satu ihram.
9. Pemakaian Kelengkapan Pelindung Diri (PPE) yang menutup anggota badan yang dilarang semasa ihram bagi jemaah yang bimbangkan keselamatan dirinya dari dijangkiti wabak, dibolehkan tetapi dikenakan Dam Takhyir dan Taqdir, satu kali dalam masa satu ihram.

Kertas Kerja 5

Tajuk: Jemaah Haji Dhuyuf Al-Rahman

10. Ibadat Haji mendidik (tarbiah) akhlak, budi pekerti dan nilai-nilai yang baik untuk menyucikan jiwa dan roh bagi persediaan untuk berjumpa Allah swt.
11. Gelaran tetamu Allah satu kemuliaan yang datang bersama tanggungjawab untuk mengisahkan diri menjadi hamba yang penuh ketakwaan.
12. Jemaah Haji perlu menghayati hikmah dan merealisasikan maqasid Ibadat haji apabila kembali ke tanah air agar melahirkan masyarakat yang soleh dan musleh.